



UNIVERSIDADE DA CORUÑA

Fundación  **INADE**
instituto atlántico del seguro

CONTRATO MARCO DE COLABORACIÓN

**CONVENIO MARCO DE COLABORACIÓN ENTRE A UNIVERSIDADE DA CORUÑA
E A FUNDACIÓN INADE****COMPARECEN**

Dunha banda, o Sr. D. Xosé Luís Armesto Barbeito, Reitor da Universidade da Coruña segundo nomeamento efectuado polo Decreto 251/2011, do 29 de decembro (DOG núm. 8, do 12 de xaneiro de 2012), actuando en nome e representación súa en virtude dos poderes outorgados polo artigo 20 da Lei orgánica 6/2001, do 21 de decembro de universidades, e do Decreto 101/2004, do 13 de maio (modificado polo Decreto 194/2007, do 11 de outubro), polo que se aproban os Estatutos da Universidade da Coruña, con CIF Q6550005J e sede social na rúa da Maestranza, 9, CP 15001 da Coruña (en adiante UDC).

Doutra, D. Antonio Cobián Varela, presidente do Padroado de Fundación Inade, Instituto Atlántico del Seguro, actuando en nome e representación súa en virtude das funcións outorgadas polo artigo 18 dos seus estatutos, segundo a escritura do 20 de febreiro de 2014, ante o Notario D. Xosé María Rueda Pérez co número 273 do seu protocolo, con CIF G27723121 e sede social na rúa Paz, n.º 2, piso baixo, CP 36202 de Vigo (Pontevedra) (en adiante FUNDACIÓN INADE)

EXPOÑEN

PRIMEIRO.- Que a UDC é unha entidade de dereito público que desenvolve actividades de formación, investigación e desenvolvemento científico e tecnolóxico, interesada en colaborar cos sectores socioeconómicos para asegurar un dos fins da formación e a investigación, que é a innovación e a modernización do sistema produtivo.

SEGUNDO.- Que, segundo os seus estatutos, para o mellor desenvolvemento das súas funcións, a Universidade da Coruña propiciará o establecemento de relacións con outras universidades, organizacións e institucións, moi en particular coas de carácter académico, científico e cultural.

TERCEIRO.- Que a FUNDACIÓN INADE é unha institución de natureza fundacional, constituída sen ánimo de lucro, cuxo patrimonio está afectado de modo duradeiro á realización dos fins de interese xeral propios da institución. Figura inscrita no Rexistro Único de Fundacións da Xunta de Galicia con número 2009/9. O seu fin principal é o fomento da economía social e de desenvolvemento da economía produtiva, todo iso a través do coñecemento nas materias de xerencia de riscos e o seguro. Ademais, entre

os seus obxectivos está a realización de actividades para mellorar a xestión empresarial e desenvolver a sociedade da información.

Para lograr estes fins, a FUNDACIÓN INADE realiza as seguintes accións:

- Información: achegar a actividade que desenvolve a Xerencia de Riscos e o Seguro á sociedade, en especial ao tecido empresarial, á comunidade universitaria e á Administración pública, así como potenciar a mellora dos profesionais ao servizo da industria aseguradora.
- Formación: ampliar os coñecementos e as actitudes do conxunto dos recursos humanos que configuran os equipos das empresas en xeral e dos operadores do mercado asegurador en particular.
- Centro de documentación: afondar no coñecemento da normativa que afecta á xerencia de riscos e do seguro.
- Acción social: apoiar iniciativas da sociedade no ámbito da cultura e divulgar o compoñente social do sector asegurador.

CUARTO.- Que tanto a FUNDACIÓN INADE como a UDC están de acordo en establecer unha colaboración nos eidos de interese común, para o que

CONVEÑEN

Estreitar as súas relacións, xuntar esforzos e establecer normas amplas de actuación que canalicen e incrementen, dentro dun marco preestablecido, os contactos e as colaboracións de acordo coas seguintes

CLÁUSULAS

PRIMEIRA.- FINALIDADE DO ACORDO MARCO

O obxecto deste acordo é o establecemento dun marco de actuación para a colaboración entre a UDC e a FUNDACIÓN INADE en actividades culturais, científicas, pedagóxicas, de investigación e outras que sexan de interese para as dúas partes.

SEGUNDA.- MODALIDADES DE COLABORACIÓN

- Execución de proxectos e programas de investigación e desenvolvemento, que se realizarán entre os institutos e/ou centros da UDC e a FUNDACIÓN INADE.
- Cooperación en programas de formación de persoal investigador e técnico.
- Asesoramento mutuo en cuestións relacionadas coa actividade das dúas entidades.
- Organización e execución de actividades comúns relacionadas coa promoción social da investigación, a docencia e o desenvolvemento tecnolóxico.
- Intercambio de persoal por tempo limitado, cando a natureza do traballo así o requira.
- Cantas outras sexan consideradas de interese mutuo, dentro das dispoñibilidades das partes e das actividades que constitúen o obxecto do presente acordo marco.

TERCEIRA.- NORMAS DE COLABORACIÓN

As colaboracións derivadas deste acordo marco quedarán sometidas ás normas aquí indicadas, á lexislación vixente, á normativa interna de cada institución e a aquelas que se acorden para cada un dos convenios específicos, tendo en conta a natureza da colaboración e o centro onde se realice o traballo.


Non se poderá realizar ningún proxecto ou programa de actuación sen estar, previamente, definido e regulado nun convenio específico.

Os acordos específicos que se realicen, vinculados a este convenio marco, deberán ser aprobados polos órganos de goberno das súas institucións e asinados polos seus representantes legais.

CUARTA.- CONTIDO DOS CONVENIOS ESPECÍFICOS

Cada proxecto e/ou programa de actuación no marco deste acordo será obxecto dun convenio específico que deberá conter, entre outros, os seguintes aspectos:

- Definición do obxectivo que se persegue.
- Descrición do plan de traballo, que incluíra as súas distintas fases e a cronoloxía do seu desenvolvemento.
- Orzamento total e medios materiais e humanos que requira o citado programa, especificando as achegas de cada entidade.
- Normas para a coordinación execución e seguimento do proxecto.
- Normas sobre confidencialidade, propiedade industrial, publicación e explotación de resultados obtidos no desenvolvemento do proxecto, no suposto de programas de investigación.



- Nomes das persoas, unha por cada parte, que se designarán por mutuo acordo e se responsabilizarán da marcha do convenio.

QUINTA.- ESTABLECEMENTO DA COMISIÓN MIXTA

Para facilitar a elaboración dos convenios específicos, o seu seguimento e cumprimento, constituirase unha comisión mixta integrada por:

- O reitor, ou persoa en quen delegar, en representación da UDC,
- D. Adolfo Campos Carballo, ou persoa en quen delegar, en representación da FUNDACIÓN INADE

A Comisión Mixta ditará as súas normas internas de funcionamento e deberá reunirse cando o solicite algunha das partes.

SEXTA.- FUNCIONAMENTO DA COMISIÓN MIXTA

Á Comisión Mixta correspóndelle, entre outras, as seguintes funcións:

- Propor posibilidades de colaboración en temas de interese común.
- Preparar os convenios específicos de execución do presente acordo marco sobre as materias seleccionadas, dentro das modalidades de colaboración establecidas na cláusula segunda.
- Remitir as propostas que elaboren aos órganos competentes das dúas partes.
- Realizar o seguimento dos convenios específicos que se subscriban, así como clarexar e decidir cantas dúbidas puideren xurdir na súa interpretación e execución.

SÉTIMA.- PERSOAL

No marco deste convenio, tanto a UDC como a FUNDACIÓN INADE poderán autorizar ao seu persoal para que realice estadias na outra entidade, sen que iso supoña ningunha alteración na relación xurídica do persoal con cada unha das partes, asumindo a súa remuneración e demais obrigas civís e sociais a entidade de orixe. Este persoal estará obrigado, nese caso, a cumprir coas normas que rexan no centro de destino.

OITAVA.- EQUIPAMENTO

Os bens que achegue unha parte nun proxecto común serán sempre da súa propiedade. A propiedade de bens inmobles ou equipos adquiridos ou construídos no

marco dun proxecto común determinarase, en cada caso, no convenio específico correspondente.

NOVENA.- FINANCIAMENTO

A subscrición do presente acordo marco non comporta obrigas económicas para ningunha das partes. Para a realización das diferentes actividades estipularase a contribución económica que, dentro das súas dispoñibilidades, cada institución poida achegar. Así mesmo, xestionarán conxuntamente a captación de recursos doutras entidades.

DÉCIMA.- CONFIDENCIALIDADE E PUBLICACIÓN DE RESULTADOS

Cada unha das partes comprométese a non difundir, baixo ningún concepto, as informacións científicas ou técnicas (Información) pertencentes á outra parte ás que poida ter acceso no desenvolvemento do presente acordo marco e na definición e preparación dos proxectos asociados aos convenios específicos que se subscriban, sempre que esas informacións non sexan de dominio público.

Neste sentido, a parte receptora da citada información manteraa en confidencialidade e estricto segredo, e evitará revelala a calquera, fóra daqueles empregados autorizados e soamente naqueles temas necesarios para o obxecto deste acordo. En calquera caso, cada parte deberá, previamente, conseguir dos citados empregados un compromiso co fin de manteren o segredo e exercerem todos os esforzos razoables para reforzar ese compromiso.

UNDÉCIMA.- PROPIEDAD INTELECTUAL E INDUSTRIAL

Toda a información revelada para os efectos do presente acordo será propiedade exclusiva da parte que a xerou. Ningunha licenza ou similar se poderá considerar derivada do intercambio de Información dunha parte cara á outra. Igualmente, ningunha parte utilizará a información da outra no seu propio beneficio.

O réxime de propiedade e xestión dos resultados derivados dos proxectos desenvolvidos no marco das actuacións asociadas a este acordo ou outros acordos específicos, será establecido en cada caso e dentro do convenio previo ao que se refire a cláusula cuarta.

DUODÉCIMA.- ENTRADA EN VIGOR E DURACIÓN

O presente acordo marco entrará en vigor no momento da súa sinatura e a súa vixencia será de dous anos. O convenio renovarase automaticamente por períodos sucesivos de dous anos, agás que calquera das partes manifeste a súa intención de

non o renovar cun aviso previo de tres meses á data de finalización do convenio ou de calquera das súas prórrogas.

DÉCIMO TERCEIRA.- MODIFICACIÓN E RESCISIÓN

As partes poderán modificar ou denunciar o presente documento en calquera momento por mutuo acordo. Calquera das partes poderá, á súa vez, denunciar o acordo comunicándoo por escrito á outra parte con tres meses de antelación á data en que o vaia dar por rematado. Nos dous casos deberanse completar as tarefas dos convenios específicos que estean vixentes.

DÉCIMO CUARTA.- XURISDICIÓN

A FUNDACIÓN INADE e a UDC comprométense a resolver de xeito amigable calquera desacordo que poida xurdir no desenvolvemento do presente acordo.

No seu caso, as partes someterán as diverxencias que se puidesen presentar en orde á interpretación ou cumprimento do presente convenio aos xulgados da orde xurisdiccional do contencioso-administrativo da cidade da Coruña, dado o carácter público da UDC.

E, en proba de conformidade con canto antecede, asinan por duplicado no lugar e data que a seguir se indican.

A Coruña, 1 de xullo de 2014

O reitor da
Universidade da Coruña



Xosé Luís Armesto Barbeito

O presidente do Padroado
da Fundación INADE



Antonio Cobián Varela